

NV ELMAR a firma contract cu Minsait



Mediante un comunicado di prensa riba su website, compania Spano di Inra Group, Minsait, a anuncia cu a firma un acuerdo cu compania di coriente di Aruba, NV ELMAR cu “lo permiti NV ELMAR modernisa su operacionnan cu rednan inteligente, alcansando un desaroyo tecnologico” comparable na e companianan energetico lider.

Den e comunicado di prensa publica diaranson, Minsait a indica cu a caba di firma un contract cu ELMAR pa completa e proyecto di midimento inteligente di e diemiles di meter cu tin reparti rond henter Aruba.

ELMAR a cuminsa na 2014 su proceso di modernisacion cu instalacion di 48mil smart meter, y na maart ta bay

agrega 2mil mas. Pa continua cu su transformacion digital, e compania a conta cu e plataforma di midimento di Minsait cu, danki na e captura y analisis di e datonan registra, por mehora e calidad di servicio y detecta posible fayonan, segun e comunicado di Minsait.

Segun Minsait, e capacidad pa habilita informacion tin como meta pa genera beneficio den e compania electrico y e consumidornan, manera un cobranza mas preciso y un respuesta mas rapido y eficaz pa cualkier error. Por ehemplo, asina e implementacion di Minsait lo por emiti alerta den caso di interupcion den suministro di coriente pa por actua di manera automatiza, reduciendo e impacto di e incidencianan y mehorando e imagen di e compania.

Ademas e plataforma di

midimento ta permiti pa conecta e datonan genera pa e meternan cu e sistemanan di cobranza of atencion na cliente, agilisando e operacionnan y mehorando e resultadonan di servicio.

M i n s a i t
Na maart di 2023, minister di Energia e tempo ey, Glenbert Croes (MEP) a reuni cu Indra/Minsait den cuadro di su vision pa un Hydrogen Valley. Den un comunicado di prensa e tempo aya, Croes a bisa cu “INDRA ta un compania cu na nivel global ta lider den tecnologia, presente den mas di 140 pais na mundo cu 56 mil profesional den servicio. INDRA su experticio y specialisacion ta riba diferente area entre otro Energia y Utilidad pero tambe riba Defensa y Seguridad, Salubridad, Sostenibilidad, Defensa Cybernetico, Trafico Aereo y Transporte.”

Durante su bishita, Croes a reuni cu Sr. Leonardo Benítez “kende ta e director cu ta maneha Utilidad y Energia, a duna un presentacion interesante, asisti pa Marcelo Marrino cu ta e Director di Energia. Durante e presentacion aki a toca diferente tema entre otro di e tecnologia den tur e areanan cu nan ta domina. Na mes momento a presenta na e mandatario tur e companianan cu nan ta traha cune na nivel global. A presenta na e Minister di



Energia di Aruba e tecnologia cu nan ta ofrece pa sigura un miho control di uzo di awa y coriente por medio di smartmeters pa no solamente e consumidor pero tambe e compania estatal tin un miho bista y control di consumo en general,” segun e comunicado di prensa di Croes na 2023.

Ehecucion na maart
Segun Minsait a bisa e siman aki, despues di e firma di e acuerdo entre NV ELMAR y Minsait na januari, e ehecucion ta bay cuminsa na maart y ta spera cu lo conclui pa fin di 2025. E compania di distribucion electrico, cu e aña aki ta bay conta cu 50mil smart meter, lo por adapta na posible demandanan nobo di e poblacion di Aruba sin necesidad di enfrente desaroyonan nobo danki na e posibilidad di escala di e plataforma tecnologico. E solucionnan di midimento di Minsait ta bay ta presente na 90 pais y ta duna servicio na mas di 500 utilities cu 500 miyon cliente. E contract cu ELMAR ta e prome di su mercado di Energia na Aruba, maske e

compania ya tin 30 aña di colaboracion cu empresanan di servicio publico di Centro America y Caribe – cu presencia na República Dominicana, Panamá, Costa Rica, Guatemala, Honduras, El Salvador, Nicaragua, Barbados, Belice y Bermudas– y tambe ta traha di manera continuo na Brazil, Colombia, Argentina y Mexico, cu un trayectoria extenso na henter Latino America.

Director di Energia na Centro America y Caribe di Minsait, Rafael Marquez, a bisa cu cu e acuerdo nobo aki, “NV ELMAR ta bay robustece no solamente su sistema di midimento, sino tambe ta bay aumenta su capacidadnan digital. Nos plataforma ta conta cu e ultimo tecnologianan y e distribuidor di coriente na Aruba tin na su disposicion e mesun innovacionnan cu e empresanan di e sector mas innovador, cu lo permiti mehora e calidad di servicio y avansa den direccion di modelonan nobo di suministro energetico.”

Prome minister a reuni cu secretario di estado Szabó tocante e negociacionnan entre Aruba y Hulanda

Durante su bishita di trabou na Hulanda, Prome Minister Evelyn Wever-Croes a reuni cu Secretario di Estado Zsolt Szabó riba varios tema importante, incluyendo e negociacionnan cu tin andando entre Aruba y Hulanda riba e debe di Covid.

Negociacionnan entre Aruba y Hulanda

Prome Minister a splica cu e negociacionnan aki a cuminsa na Juni 2024 despues di a cera un acuerdo e tempo ey cu Secretario di Estado Alexandra van Huffelen. Den e acuerdo aki a palabra cu e interes di 6.9% cu Aruba tabata paga riba e debe di Covid ta baha na 5.1% bou



di e condicion cu lo traha na hancra e supervision financiero mas firmemente. Cu esaki Hulanda kier sigura cu Aruba lo paga bek e 916 miyon florin cu a wordo fia durante e temporada di Covid.

Na e momento aki e supervision financiero ta den un ley local, un “landsverordening” pero e no

ta bon regla. E normanan ta anticua y no tin un manera facil pa por sali di esaki. Pa e motibo aki, mirando cu e negociacionnan ta andando, Gobierno a probcha pa traha un ley mas den beneficio di pais Aruba. Si logra esaki, e interes por baha te na 3.4%, y lo bin tambe un miho “exit clause”, un manera mas facil di por sali di e Rijkswet pa asina Aruba por haya bek su

autonomia financiero.

Puntonan di deliberacion

Un di e puntonan di deliberacion ta un palabracion cu Hulanda cu lo bin un ley di Reino cu ta e “rijkswet”, y un ley local “landsverordening”. Den e ley di Reino ta bay hancra e definicionnan, kico ta un norma financiero, un norma di presupuesto, of kico ta un norma di debe. Den e ley local ta bay hancra e porcentahe, por ehempel si e surplus mester ta 1%, esey lo bay den e ley local cu Parlamento ta stipula.

Un otro palabracion ta cu lo bay bin un bon “exit clause”. E clausula aki lo indica cu si Aruba cumpli cu un of mas di e condicionnan,

e ora lo por automaticamente sali for di e ley di Reino. Esaki no tin na e momentonan aki, ni den e Raft cu tabata tin riba mesa. P’esey ta importante pa hancra esaki den e ley di Reino. Unabes cu logra sali di e ley di Reino, Aruba lo haya su autonomia financiero bek.

Ta importante si pa enfatisa cu Aruba lo mester hiba un maneho financiero debido, saludabel, y responsabel. Tambe mester cumpli cu e normanan y mester tin supervision financiero, sino ta CAft ta un otro, y esaki ta loke nos ta yama nos “begrotingskamer”. Tambe a wordo palabra cu Hulanda lo refinancia e debenan bieu di Aruba na 3.4%.